

## بهلوان

بهلون .. بهلوان .. بهلوان  
دنيا فيها الكل عايش بهلوان  
مهما مرّ العمر بينا .. دموع حزينة  
تترسم ضحكه ف عينا  
تبتسم تقاطيع وشوشنا  
تنام رموشنا .. جوه حلم جديد علينا  
عشنا فيه أيام زمان  
حلم أكبر من .. حياتنا ، ومن سكاتنا  
سنين طويلة .. مالنا حيلة  
غير أمل نبنيه لبكره  
ألف فكرة .. بتتولد جواه جميلة  
بكره أجمل م اللي فات ... إيه كمان !؟  
الحاجات المستحيلة ..  
تتولد .. جوه السكات  
مش بالكلام ... ولا بالملام



هنعيشه حلم بنزرعه ..وسط الألام  
ترويه دموعنا..فرحة رجوعنا  
لـ..حق طالع..

طول عمره ضايع...من زمان

....

خايفة ليه من وشي.. سامحي

وشي قمحي

ألوان كتير دارت ملامحي

حزني متكفّن ف فرحي

جرح عمره سنين وخايف

بس حالف..ترجع البسمه العينين

وحقي عارف أرجعه..

إزاي ..وفين..؟

كل عمري.. مش كفايه أضحى بيه

حتى ابني ...

مش هاعزّه ف يوم عليكي

لو سمعت نداكي ليه



مش مهم حياتنا إحنا  
ولَّا يكمل يوم فرحنا  
إلَّا لما تطيب جروحك  
ياللي روحك أعلى من كل المعاني  
وأجي تاني .. بوش باسم  
ضحكة ادوقها .. بس صافيه ..  
تحت ألواني وفوقها  
وان تعبني شوقي ليكي  
مش راح اسكت .. ولَّا هابعد  
هارمي نفسي جوه حضنك  
ياحبيبتى .. وبين ايديكي

....